

## Morning Dogri (NSD) National News Bulletin 30-09-2024

- प्रधानमंत्री नरेन्द्र मोदी होरें रचनात्मक कम्म करने आलें गी सूचना ते प्रसारण मंत्रालय आस्सेआ “क्रिएट इन इंडिया” थीम तैहत आयोजत 25 चुनौतिएं आले कार्यक्रम च हिस्सा लेने दी अपील कीती।
- जम्मू कश्मीर च विधानसभा चुनाएं दे त्रीए ते खीरले गेड़ लेई सब्बै तैआरियां करी लैतियां गेइयां न।
- प्रधानमंत्री नरेन्द्र मोदी होरें कांग्रेस अध्यक्ष मल्लिकार्जुन खड़गे हुंदी सेहत बारै जानकारी हासल कीती।
- डब्ल्यूएफपी नै लेबनान च इजराइल ते हिजबुल्लाह दे बश्कार लड़ाई कारण प्रभावत होए दे लोकें गी मदाद पजाने लेई आपात आपरेशन शुरू कीता ऐ।
- ब्रुनेई च खेड्डी गेई जूनियर विश्व वुशु प्रतियोगिता 2024 च भारत नै कुल 7 तगमे जित्ते जेह्दे च सुन्ने दे 2, चांदी दा इक ते कैह 4 तगमें शामिल न।



### **PM Modi**

प्रधानमंत्री नरेन्द्र मोदी होरें नौकरिएं दी तेजिया कन्नै बघदी ते बदलदी प्रकृति ते गेभिंंग ते एनीमेशन ते फिल्म निर्माण जनेए सूचनात्मक क्षेत्रें च पैदा होआ'रदिएं संभावनाएं बक्खी ध्यान देने दी जरूरतै पर जोर दित्ता ऐ। कल आकाशवाणी पर प्रसारत अपने मन की बात कार्यक्रम च मोदी होरें आखेआ जे रचनात्मक प्रतिभाएं दे क्षेत्र च कम्म रोजगार दियां वेशमार छमता मजूद न। उनें नमें तरीके कन्नै रचनात्मक कम्म करने आलें गी साद्दा दित्ता जे ओह “क्रिएट इन इंडिया” थीम दे तैहत सूचना ते प्रसारण मंत्रालय आस्सेआ आयोजत 25 चुनौतिएं आले कार्यक्रम च जरूर हिस्सा लेन जेह्दे बारे जानकारी वेवसइंडियाओआरजी वेबसाइट पर हासल कीती जाई सकदी ऐ। एह्दे शा पैहले इस्सै ब'रे 22 अगस्त गी केन्द्री सूचना ते प्रसारण मंत्री अश्विनी वैष्णव होरें नमीं दिल्ली च क्रिएट इन इंडिया चैलेंज दे पैहले संस्करण दी शुरूआत कीती ही।

एह कार्यक्रम प्रधानमंत्री मोदी हुंदे भारत च डिजाइन, दुनिया लेई डिजाइन आले नजरियै कन्ने जुड़े दा ऐ। इस चैलेंज च हिस्सा लेइयै औंदे विश्व आडियो विजुअल ते मनोरंजन शिखर सम्मेलन लेई तैआरी कीती जाई सकदी ऐ।

<><><><><><>

## JK Election

जम्मू कश्मीर च विधानसभा चुनाएं दे त्रीए ते खीरले गेड़ लेई सब्बै तैआरियां करी लैतियां गेइयां न। शातिपूर्ण, रमानदारी ते निरपक्ख ढंगै सिर मतदान करोआने लेई सुरक्षा दे लोड़चदे इंतजाम कीते गे न। कल होने आले त्रीए गेड़ दे चुनां च 7 जिले दिएं 40एं विधानसभा सीटें लेई वोट पाए जाने न। इनें 40एं थमां 16 कश्मीर खित्ते च ते 24 जम्मू खित्ते च न। कल होने आले मतदान लेई चुनां प्रचार कल संजा सम्पन्न होई गेआ हा। इस गेड़ ४ कुल 415 मेदवार चुनां मैदान च न ते मतदाताएं दी कुल गिनतरी 39 लक्ख 10 जहार ऐ। जम्मू कश्मीर च विधानसभा चुनां दे त्रीए ते खीरले गेड़ लेई चुनां प्रचार कल संजा मुक्की गेआ हा।

<><><><><><>

## JK-Suspension

प्रदेश च चुनां प्रचार ते होरने सरबंधी सियासी गतिविधिएं च सरकारी मलाजमें दी शमूलियत दा संज्ञान लेंदे होई जम्मू कश्मीर दे चुनां दफतरै 23 मलाजमें गी मुअत्तल करने दे कन्नो कन्नी आदर्श अचार संहिता दी खलाफवर्जी लेई ठेके ते एडहाक पर लाए गेदे 6 मलाजमें गी कम्मै शा हटाई दितता ऐ। एहदे इलावा ऐसे 20 मुलाजमें गी उंदे पराने दफतरें शा हटाइयै होरने तैहसीलें ते जिले दे दफतरे च लाया गेआ ऐ, जिंदे खलाफ फर्कोफर्की आला गेंह अख्तिवार करने दियां शकैता सामने आइयां हियां। जारी असैबली चुनाएं दरान चुनां दफतरै प्रदेश च बक्ख-बक्ख अजेसिएं दे राएं कुल 130 करोड़ रपे जब्त कीते न। एहदे च पुलस मैहकमे नै सब्बने शा मते 107 करोड़ 50 लक्ख रपे केन्द्री जीएसटी आस्सेआ 9 करोड़ 88 लक्ख शा, राज्य जीएसटी आस्सेआ 8 करोड़ 3 लक्ख रपे, एनसीबी आस्सेआ 2 करोड़ 6 लक्ख रपे, औंदन टैक्स मैहकमे आस्सेआ 87 लक्ख रपे ते स्टेट एक्साईज डिपार्टमेंट आस्सेआ 50 लक्ख रपे जब्त कीते गे न।

नशीले पद्धार्थ, नगदी ते शराब गी गैर कनूनी तरीके कन्नै लैने आलें खलाफ सख्त कारवाई करदे होई सरबंधत अजेसिएं अजे तगर 32 एफआईआर दर्ज कीतियां न।

<><><><><><>

## PM- Khadge

प्रधानमंत्री नरेन्द्र मोदी होरें कांग्रेस पार्टी दे राष्ट्रीय अध्यक्ष मल्लिकार्जुन खड़गे हुंदे नै गल्ल कीती ते उंदी डौल पुच्छी। जियां जे पैहले बी खबर दित्ती जाई चुकी दी ऐ जे कल जम्मू कश्मीर दे कटुआ जिले च इक चुनां रैली गी संबोधत करदे होई उनेंगी चक्कर ते तरेली आई गई ही ते उनेंगी तुरत अस्पताल पजाया गेआ हा। जम्मू कश्मीर विधानसभा चुनां दे त्रीए ते खीरी गेड दे प्रचार दे खीरी रोज कल इक बड्डी रैली संबोधत करा'रदे हे। चुनां रैलिएं गी संबोधत करने दे बाद चक्कर औने दा कारण जानने लेई उंदी जांच कीती गई।

<><><><><><>

## WFP-Lebnon

विश्व खाद्य कार्यक्रम डब्ल्यूएफपी नै लेबनान च इजराइल ते हिजबुल्लाह बश्कार चलै करदे संघर्ष करी प्रभावत 10 लक्ख कोला मते लोकें गी रूट्टी ते खाने पीने आला समेयान उपलब्ध कराने लेई इक इमरजेसी आपरेशन शुरू कीता ऐ। डब्ल्यूएफपी नै आखेआ ऐ जे ओ लोकें गी रूट्टी, पानी, चाह-काँफी ते खाने पीने आला होर जरूरी समेयान उपलब्ध करा करदा ऐ जेहडे उत्थें आसरमें च अपनी जान बचाने लेई बैठे दे न। पिछले हफते दे खीरै च लड़ाई च आई दी तेजी दे बाद तुरत मनुक्खी सहायता दी लोड मसूस कीती गई ऐ। डब्ल्यूएफपी नै आखेआ जे उत्थें विपदा च फसे दे लोकें गी मनुक्खता दे आधार पर सहायता पजाने लेई इस ब8रे दी खीरै तोड़ी 10 करोड 50 लक्ख अमरीकी डॉलरें दी लोड ऐ ते अंतर्राष्ट्रीय समुदाय अगगे अपील कीती जे ओ संसाधन ते समर्थन मनुक्खता दे आधार पर उपलब्ध करा।

<><><><><><>

## Jaishankar-US

विदेश मंत्री डॉ. एस.जयशंकर होरे कल वाशिंग्टन डीसी च अपने अमरीकी हमरूतबा टोनी ब्लिंकन हुंदे नै मलाटी करगंन। इस दरान दौनें बशकार केई सारे दपक्खी ते वैश्विक मामले जेहदे च यूक्रेन युद्ध ते पच्छिम एशिया सरबंधी मामले शामिल न दे बारे च चर्चा होग। डॉ. जयशंकर होरे कल अमरीका दी राजधानी पुज्जे हे। ओह इस दरान बाइडेन प्रशासन दे होर केई बड्डे मंत्रिएं ते अधिकारिएं कन्नै बी मिलगंन। एहूदे इलावा उंदा अमरीका च कूटनीतिक मामले दे बचारमंच ते माहिरें कन्नै बी मलाटी लाने दा कार्यक्रम ऐ। एहूदे शा पैहले इस म्हीने दी 21 तरीक गी डेलावेयर च अपने निवास पर अमरीका दे राष्ट्रपति जो बाइडेन होरे प्रधानमंत्री नरेन्द्र मोदी हुंदी मेजबानी कीती ह हीते दौनें बशकार दपक्खी बैठक बी होई ही।



## Jamaica PM

जमैका दे प्रधानमंत्री डॉ. एन्ड्र्यू होलनेस होर अज्जै थमां भारत दी चार दिन दी अधिकारिक यात्रा पर आवा'रदे न। एहू उंदी भारत दी पैहली यात्रा ते इस दौरान ओ दपक्खी बैठक बी करगन। ऐहूदे शां पैहले जमैका दे प्रधानमंत्री ते भारत दे प्रधानमंत्री नरेन्द्र मोदी हुंदे कन्नै केई बारी बहुराष्ट्रीय मीटिंगें च मलाटी करी चुके दे न। डॉ. होलनेस होर प्रधानमंत्री मोदी हुंदे इलावा राष्ट्रपति ते उपराष्ट्रपति हुंदे कन्नै बी मलाटी करगंन।



## Wushu

ब्रुनेई च खेड्डी गई जूनियर विश्व वुशु प्रतियोगिता 2024 च भारत नै कुल 7 तगमे जित्ते जेहदे च सुन्ने दे 2, चांदी दा इक ते कैह 4 तगमें शामिल न। भारत दे आर्यन ते शोर्या नै सुन्ने दे तगमें जित्ते। आर्यन नै चीन दे गांग हुनरान ते शोर्या लै ईरान दे अलीरेजा जमानी गी हराया।



## IMD

मौसम विभाग नै अगले 5एं दिनें लेई देसे दे पूर्वोत्तर हिस्सें च मौलेधार बरखा दी संभावना जताई ऐ। मैहकमे मूजब अज्ज तमिलनाडू ते केरल च ते औंदे अगले 7एं दिनें दरान असम, मेघालय, नागालेंड, मणिपुर, मिजोरम, त्रिपुरा ते अरुणचल प्रदेश च बी टांवी-टांवी थाहरे पर बरखा बरने दे आसार दस्से न।

<><><><><><>